



Norges vassdrags- og energidirektorat
Postboks 5091 Majorstua
0301 OSLO

201101180-13
Ki/SAAS

Halsa kommune - Skallelva kraft AS - bygging av Skallelva kraftverk – Fråsegn til søknad om konsesjon.

Fylkesmannen viser til brev av 25.04.13 der vi blir bedt om å kome med fråsegn til søknad om bygging av Skallelva kraftverk.

Konklusjon:

Etter Fylkesmannens vurdering tilfredstiller søknaden kravet til kunnskapsgrunnlaget i naturmangfaldlovva (§ 8).

Fylkesmannen har med medhald av vassressurslova § 24 motsegn til Skallelva kraftverk med eit inntak ovanfor fossen. Vi legg til grunn at ei slik utbygging vil redusere den sjeldne naturtypen fossesprøytsone med fosseeng, som er den einaste registrerte i sitt slag på Nordmøre.

Fylkesmannen kan tilrå ei utbygging med inntak i hovudelva nedanfor fossen/fossesprøytsona.

Bakgrunn

- Skallelva Kraft AS vil utnytte fallet i Skallelva frå kotehøgde 355 ned til eit kraftverk på kote 90. I tillegg skal det overførast vatn frå eit planlagt inntak i Gammelseterbekken på ca kote 365 og til Mellomelva (ca. kote 360) til Skallelva.
- Maksimal slukeevne er på 480 l/s. Dette er 480 % av middelvassføringa på 100 l/s. Minimum slukeevne er på 24 l/s og alminneleg lågvassføring er rekna til 7 l/s i Skallelva, 3,0 l/s i mellomelva og 4,0 l/s i Gammelseterbekken
- Det er føresett ei minstevassføring tilsvarande alminneleg lågvassføring for kvar av vassdraga.
- Vassvegen blir om lag 1120 m som skal gravast ned. Diameter 450 mm. I tillegg 610 m overføringsrør frå dei to elvene.
- Det er rekna med ein midlare årsproduksjon på ca. 2,88 GWh med installert effekt på 1050 W.

Vurdering

Biologisk mangfald

Rapporten gir god informasjon om kunnskapsgrunnlaget for utbyggingsområdet. Han inneheld også ein god del om vegetasjonen samt om karplantar, lav og mosar. Sjølv om det

ikkje er funne sjeldne artar i området viser det seg at artsdiversiteten er høg. I det heile skil naturen i vassdragsområdet seg ut frå det som er vanleg. Det eine er funn av artar som indikerer næringsrikt/kalkhaldig jordsmonn med artar som gulsildre og breiull. Truleg på grunn av at det øvst i elva kryssar det ei åre med amfibolitt og glimmerskifer.

I fossen er det mosar som er sterkt avhengige av eit stabilt og fuktig miljø. Mosefloraen har karakter av å vere sers artsrik samanlikna med det som er vanleg ved og i slike små elver på Nordmøre. I den øvre delen vart det registrert nærare 50 artar.

Etter rapporten står den artsrike fosseenga i fare for å bli øydelagt om prosjektet blir gjennomført. Fossesprøytsoner er ein av våre mest varierte naturtypar og som Noreg har eit internasjonalt ansvar for å ta vare på. I slike område finn ein eit mangfald av element og artar som ikkje er vanlege i mindre fuktig naturmiljø. I rapporten er dette vassdraget samanlikna med andre nedbørsfelt. Dette er eit avsnitt som er lite avklarande. Det er få kjente vassdrag i fylket med fossesprøytsoner med godt utvikla fosseenger og med ein stort sett stabil fossesprøyt. Som grunnlag for denne konklusjonen bygger vi på vår innsamling av data gjennom mellom anna kommunevis kartlegging av biologisk mangfald og som er presenterte i Naturbase samt gjennom vår handsaming av eit stort tal søknader om bygging av småkraftverk dei siste åra. Etter ein gjennomgang av Naturbase for alle kommunane på Nordmøre viser det seg at denne fosseenga er den einaste som er registrert. Sidan det gjeld ein sjeldan naturtype finn vi å reise motsegn til eit inntak ovanfor fossen. Vi legg til grunn at fosseenga vil minke i omfang og at fleire av artane får reduserte førekomstar som følge av ei utbygging. Tiltaket slik som det no er søkt om risikerer å svekke viktige biologiske og økologiske samanhengar med ei alvorleg påverknad av fosseenga.

Landskap, friluftsliv og INON

Røyrgata, som vil bli graven ned, går stort sett gjennom område som alt er forstyrta av menneskeleg aktivitet som hogst- og plantefelt og skogsvegar. Dette gjeld særleg i nedre del av området. I øvre del av området er påverknaden klart mindre. Etter avslutta anleggsarbeid vil dei landskapsmessige konsekvensane etter vårt syn vere relativt små.

Etter det vi kjenner til er friluftssinteressene i området hovudsakleg av lokal karakter.

Rognskogfjellet er i Fylkesdelplan for inngrepsfrie naturområde i Møre og Romsdal (vedtatt år 2000) vist som del av eit av dei større og dermed prioriterte inngrepsfrie områda i fylket (Område 11: Fjellområda mellom Halså og Surnadal). Sidan planen vart utarbeidd har det alt skjedd inngrep som har redusert og delt opp mykje av dette området og vi må nok konstatere at fylkesplanen ikkje har klart å ta vare på dette arealet slik som planføresetnadene var. Tiltaket vil redusere eit inngrepsfritt område ved Rognskogfjellet i sone 2 (1-3 km frå inngrep) med ca. 0,75 km². Dette må takast med i vurderinga ved behandling av søknaden.

Fisk

Det er gjort fiskeundersøking og søk etter elvemusling i vassdraget. Det blir konkludert at det ikkje finst anadrom fisk og elevmusling i Skallelva. Det er heller ikkje registret ål i vassdraget.

Vi kan ikkje sjå at det er naudsynt med behandling av tiltaket etter laks- og innlandsfisklova.

Forureining

Vi kan ikkje sjå at utbygginga vil føre til slik fare for forureining at det er naudsynt med særskilt behandling etter forureiningslova.

Konklusjon

Fylkesmannen viser til merknadene over. Eit inntak i hovudelva ovanfor fossen vil medføre at den sjeldne naturtypen fossesprøytsone med fosseeng, som Norge har eit internasjonal ansvar å ta vare på, blir redusert eller står i fare for å bli øydelagt. Vi reiser derfor motsegn til planen på dette punkt. Vi rår til at ein i staden utgreier eit alternativ med inntak nedanfor fossen, slik at ein framleis kan ta vare på denne naturtypen.

Med helsing

Rigmor Brøste (e.f.)
ass. fylkesmann

Lindis Nerbø
direktør miljøvernavingdelinga

Dokumentet er elektronisk godkjent og har ingen signatur.

Fagsaksbehandler

Biologisk mangfald: Kjell Lyse, tlf. 71 25 84 26

Kopi:

Halsa kommune		6683	Vågland
Direktoratet for naturforvaltning	Postboks 5672 Sluppen	7485	TRONDHEIM
Møre og Romsdal	Fylkeshuset	6404	Molde
fylkeskommune			